

Khris' Suangphum

Suangphum lepkhitsa loungal suangphum dang kuamah in a lem theita kei, huai suangphum Jesu Khrist ahi - 1 Kor. 3:11

Vol. XX. No. 01

PRIVATE CIRCULATION

January 2, 2022

A Kikhek Khovel a AKIKHEK NGEILOU

- Jamson -

Imuh theih hi'n I muh theihlouh thilte ah hitaleh, I kim leh kiang ah thil tampi a kikhek om hi. Ni, kha leh kumte a ahong kikhekzel a, tu'n leng kum kikhek in 2022 ah I ding toutes uhi. Maban ah leng ahong kikhek touzel lai diing. Ni, kha leh kumte gentaklouh I government bang a kikhengzel a, I dan leh thupiakte uh nasan leng a hun hong kikhek dungzui in a kihengzel. I khotang leh I tawndante bang leng naktak in a kikheng lamdangta. I siamsinna, I nasepna, I kim leh kiang a thil tengteng a kikheklohim a omkei. Hiai bang a thil kikhekkhekte'n khovel thilte muantak a kingakna tak hilou ahihdan leh bangmah omdenlou hial diing ahihdan (2 Peter 3:10) hon phoksak thakthak hi. Hiai bang a thil kikhekhek lak ah muantak leh kingakna tak, a kikhek ngeilou thil a om diam? A nuai ah saulou in thildangte kikhekkhe mahleh muantak leh kingakna tak, a kikhek ngeilou diing om ahihdan I taklang suk diing.

Pathian

Zawlnei Malaki laibu ah Pathian in ahihna hiae bang in ana gen hi, "**Kei Toupa ka hi, ka kikhek ngeikei/I am the Lord, I do not change**" (Malaki 3:6). Huan, Thukhun Thak ah leng Pathian hihna toh kisai hiae bang a gen in ana om hi, "**Thilpiak hoih leh thilpiak buching tunglam apan a vakte Pa kiang a kipan a hongsuk ahi a, amah ah lam-danna leh kikhekna lim a omkei hi**" (Jakob 1:17). Pathian a kikhek ngeilouh kia hilou in a thiltupte nasan leng akikhek ngeikei lai hi (Hebrute 6:17).

Jesu

Laisiangthou in Jesu kikhek ngeilou ahihdan hiae bang in ana chiamteh hi. "**Jesu Khris tuh zan, tuni, leh tangtawn in a ngeingei in a om gige hi**" (Hebrute 13:8). Hebru laikhak mah ah Jesu Khris hihna toh kisai hiae bang a gen in ana om nawn hi, "**Huan nang, Toupa, a tung in lei-lung kingakna na phumkhin a, Van leng na khutsuak ahi; Hiaite a hong mangthang diing ua, nang bel om tawntung diing na hi; huaite tengteng puansilh bang in a honglui diing ua, Puan bang in na zial diing a, puansilh banglel in a hong lamdangta dia; nang bel a ngeingei na hidem a, na kumte leng a mang kei diing hi, chi in**" (Hebrute 1:10-12). Sawltakpi Johan in leng Kilakna laibu ah Jesu tuh "**a om-lel, omsa leh hongpai ngei diing pa**" chi'n ana gen hi (cf. Kilakna 1:4).

Bible

Khovel ah pilna leh siamna toh kisai a laibuite ahun dungzui in kikhekzel mahleh Pathian hatkhum a piak Bible tuh a kikhek ngeikei. Bible tuh Pathian thu ahihman in lei leh van mang mahleh a mang in a kikhek ngeikei diing. "**Lei leh van amang dia, ka thu ahihleh a mang kei diing hi**" (Matthai 24:35). Bible, Pathian thu bel "**setdet dia khatvei piak a om**" ahi hi (Juda 3). Huaiziak in behlap theih hiam

Iakkhen theih hiam ahikei hi (Deut. 4:2; Kilakna 22:18).

Mihingte hotdamna dia Pathian thilgel.

Pathian in a Tanchin Hoih in ahon sam a, huai a Tanchin Hoih tungtawn mah a mielingte hotdam tuh a geeldan (plan) ahi (1 Thes. 2:14; 1 Kor. 15:1-4). Huai Tanchin hoih tuh '**hotdamna diing a Pathian thilhii theihna**' ahi (Romte 1:16). Hiai lou Tanchin Hoih dang a omkei. Pathian in Sawltakpi Paul tungtawn in Tanchin Hoih dang omlou ahihdan kichiantak in ana genta hi. "**Khris Hehpihna ziak a nou honsampa huchi guih a Tanchin Hoih tuam lam a na kisuansan uh lamdang kasa hi; Tanchih Hoih dang om ahi kei a; noumau hon hihbuai in Khrist Tanchin Hoih hih lam-dang ut kuat hiam a om uh ahizaw hi**" (Galatiate 1:6,7). Midang kuamah kiang ah hotdamna a omkei (Nasepte 4:12). Jesu tuh Lampi, Thutak leh Hinna omsun ahi (Johan 14:6).

Pathian in mielingte apan a lamet (expectation)

Khovel a bangteng a kikhekta zong in Pathian in a siamsa mielingte apan a deih tuh a danglam ngeikei. Pathian in ahon lamet tuh a **thupiak zuih ahih tawntung hi. "Toupa, Toupa hon chi napeuh vangam a lutkei diing uh, ka pa van a om deihlam hihte a lut diing uh"** (Matthai 7:21). "**Hiai thu leh la tawpna ahi; avek in zakin a omta: Pathian laudan siam inla, athupiakte zui in; hiai lah mieling hih diing pumpi ahi**" (Eklisiasti 12:12).

Thusitna

I kim leh kiang a thil akikhek vengvung lai in a kikhek ngeilou Pathian tangtawn thilte ah I kipak in I nuam diing uh. A kikhek ngeilou Pathian tangtawn thilte I limsak diing ua, huaite ah I kipumpiak diing uh. Hun leh nite kikhek mahleh I Pathian leh a thu a kikhek ngeikei. Pathian leh a thute a hun dungzui a khek thei ahikei. Ei Pathian thu bang a I kikhek diing ahizaw. □□□

PLACE OF WORSHIP

Sacred Heart Cathedral,
Yusuf Sadan, Ashoka Road,
Delhi - 110001

Phone No. 9953968807
website : www.cocdelhi.org

**'KHRIS' SUANGPHUM, A WEEKLY BULLETIN FOR
THE MEMBERS OF THE CHURCH OF CHRIST, DELHI,
ON THE FIRST DAY OF THE WEEK'**

Enkaitu : Jamson Guite

BIBLE CLASS

Class

Adult	: Khenpi, Siamkhanmuan
Inter.	: James & Jamson
Junior	: Ginsuan & Suanlian
Primary	: Minlun & Niangngaihching
Beginner	: Chingkhanlun & Pauliansiam

Teacher

TOUPA NI THILPIAK

Date 26.12.2021 ₹ 39,260/-

Online Sermon

Toupa' Ni

Date 02.01.2022

Hun-uk thumna : Kamkhenthang

Thugen : Jamson

Thumna : Janglet

Toupa' Ni

Date 09.01.2022

Hun-uk thumna : Lang James

Thugen : Jamson

Thumna : Nekkothang

KIKHOPNA INN TENG KIKHAK

■ Delhi a Covid-19 vei ahong pun hat mahmah ziak in Delhi solkar in Delhi sung a mipi kipumkhawm khamna ahon puan toh kiton in Delhi a biakna mun tengteng kikhak vek hi. Ei biakkhawmna mun leng kikhak ahihman in tuni tarik January 2, 2022 pai-khawm a biakna omtheilou hi. Poi petmah chihlou hihtheih omlou. Maban pai diing dan tu kiginni meeting a gelkhawm hi diing hi.

INN LUAHTHAK

■ Unaupa Ginsuan-te nupa in Vasant Vihar ah inn ana luahthak uhi. A address chiamteh nuamte a diing in flat No. 119, 3rd floor, Vasant Apartment, Vasant Vihar, N.Delhi-110057. Unaunu Hoihmunkim bel amah kia in Katwaria Sarai ah innluah in om hi.

VISITATION PROGRAM

■ Preacher visitation program Delhi congregation whatsapp group ah ana en chiat ni.

THOUGHT OF THE WEEK

**A langtang a salhna a guk a itna sang
in a hoihzaw hi - Paunakte 27:5**

THU TUAMTUAM

HONGTUNG UH

■ Phalbi hun awl zang diing a Lamka lam a pai unaupa Siamkhanmuante innkuwan kal paisa nilaini in Lamka apan in Delhi damtak in hongtung kikta uhi.

■ Sepna vai a Pune lam a ana zinkhia unaupa Kamkhenthang leng kal paisa ningani in Pathian venna toh damtak in hongtung kikta.

SUTI HONG PAI

■ Tulel a East Bengal mun a sem lel unaupa Thanglianmang suti hong pai a tun ilak uah omlel hi. Tukha kimkhat sung khong omthei diing hi'n kigen hi.

ZINKHIA UH

■ Unaupa Michael Seilenmang leng kal masa in Sikkim lam ah a lawmte kitenna uap diing in ana zinkhia hi.

■ Unaunu Niangpal leng a khua uh Buangmun lam ah hun awl zang diing in december 20,2021 in ana pai a huailam ah va omlel hi.

■ Lamka lam a va zin unaupa Joseph Suantak-te nupa leng huailam ah va omtadih photlai uh.

■ Kal paita sintawpni in unaupa Thongginliante innkuwan leng innsung vai poimoh tuamtuam ziak in Lamka lam ah ana zin uhi. Nipi kal nih sung vel huailam ah hun vazang diing uhi.

NGAPLOU

■ Unaupa Timothy Jangminthang kal paisa sintawpni apan in khosik ziak in ngaplov in ana om a an leng netheilou hi. Tonsil ziak a khosik ahih-dan mukhiak hi a, tun damdawi ne in inn ah ki-enkol lel. Pathian panpihna toh tuni tan in hoihsot mahmahta hi.

■ Unaunu Manmuankim leng hitang khosik ziak in ngaplov in ni bangzah hiam ana om mahleh Pathian panpihna toh damna mu in na leng sem zou nawnta.

THU TUAMTUAM

KIKNAWNTA UH

■ Winter lectureship 2021 mang dia hongzin unaupa Jamkhogin leh mit ensak dia hongzin unaunu Ngaizahat-te kal paita seppatni in Lamka lam ah ana kiknawnta uhi. Lectureship mang ding liauliau a hong zin unaupa Jamkhogin etthon huai mahmah. Aman a omsung in i labu ua la sak theih nailouh bangzah hiam leng hon zilpih man hi. Kipahuai mahmah.

■ Unaupa Endrew in leng i lak ua nipi kal khat vel hun ahon zat nung in kal paita seppatni mah in a sepna munlam honna zotsan nawnta.

■ Tuma lam a mit atsak diing a Delhi hongzin unaupa Khamzadong-te nupa in kal paita nilaini in Lamka lam ah honna paikiksan nawta uhi. A omsung un a mit lohchingtak in atsak thei ua khua leng mutheita hi.

HONGZIN

■ Unaupa Chinkhotuan leng ki-ensak diing leh poimoh khenkhat ziak in Delhi hongzin a tun Delhi ah omlel hi. Bangtan omthei diing hiam chih bel theih hitadilou.

KISUKHA

■ Kal paita Toupa Ni biakna zoh singpi dawn lai in Master Mangmuansiam s/o unaunu Niangbawi kipuk in a khabeh tatkek kha hi. RML damdawi inn a taipih in va khuisak pah uh.

MEETING OM DIING

■ A hongtung diing January 8, 2022 chiang in gelkholsa bang in unaupa Jamson tenna inn Mohammadpur a Saptuam business meeting neih hi diing hi. Unaupasalte hiae hun a tel thei diing in kimansak chiat ni. A tam theilam tel diing in i kisa diing uh. Kum thak 2022 a business vaipaw dingte kiang ah chagre piakkhiakna leng om ngal diing hi.